



Sa drizzà als preschents è er Gian-Luca Lardi, il president dals impressaris da construcziun svizzers.

FOTOS G. N. STGIER

Adina damain rentabilitad

Societad grischuna dals impressaris da construcziun

DA GION NUTEGN STGIER / ANR

■ **Grazia a la blera lavur dal maun public ed al boom da construir da Tusaun fin la Val dal Rain grischuna fan ils impressaris da construcziun ina bilantscha positiva dal davos onn. La concurrenza vegn però adina pli gronda e la rentabilitad adina pli pitschna.** Ils impressaris da construcziun dal Grischun central èn stads ospitants da lur collegas ed han organisà la radunanza generala 2017 ad Andeer. Bunamain 80 impressaris èn stads da la partida e cunzunt blera prominenzia da la politica e da l'economia. La Societad grischuna dals impressaris da construcziun exista dapi il 1906 e da preschent appartegnan 130 interpresas a l'uniun tetgala. Beneventada è la raspada er vegnida da *Hans Andrea Fontana*, il president da la vischnanca dad Andeer. El ha menziunà che la bransch da construcziun saja per il lieu e per l'entira regiun da gronda valur. In product saja enconuschent er lunsch sur ils cunfins grischuns e quai saja il granit dad Andeer cun ina tradiziun fitg gronda.

Damain lavur en las regions turisticas

L'onn 2011 aveva la bransch da construcziun anc fatg en noss chantun ina svieuta da passa ina milliarda francs. L'onn passà en quai stads 991,7 milliuns francs, ditg auter suenter tschintg onns il meglier resultat. Pussaivel è quai cunzunt stà grazia a la blera lavur da chantun e vischnancas, da la construcziun bassa e da la gronda activitad da bajegiari da Tusaun fin Maiavilla. La construcziun auta,

quella è danovamain sa reducida ferm en las regions turisticas en consequenza da l'iniziativa da las abitaziuns secundaras. Sin fundament da quella realitad èn la concurrenza da pretschs e l'interess da vegnir tar lavur in vair cumbat tranter las firmas da construcziun. Ultra da quai vegnan interpresas da construcziun da las valladas dal sid adina pli activas er en il Grischun dal nord. *Markus Derungs*, il president dals impressaris da construcziun dal Grischun, ha ditg che lavur saja avant maun, dentant la rentabilitad, quella daventia adina pli pitschna.

60 miraders e construiders da vias

Fatg curaschi als impressaris da construcziun ha *Mario Cavigelli*, il cusseglier guvernativ e schef dal departament da construcziun. Er en l'avegnir vegnia il chantun ad investir per onn var 250 milliuns francs per vias principalas, per vias lateralas e per objects da tut gener. Quest onn giaschan las investiziuns schizunt tar ina summa da 300 milliuns francs, ha ditg Cavigelli. Avenan las interpresas da construcziun da noss chantun avant sis onns anc radund 5700 emploiads èn quai stads il davos onn 800 lavurants damain. La bransch da construcziun è dal reminent ina impurtanta pitga da l'economia grischuna cun ina summa da pagas da radund 350 milliuns francs. In fatg plaschaivel è er che mintg'onn termineschan en noss chantun 60 miraders e construiders da vias lur emprendissadi.

In nov contract da lavur general

A pled è er vegnì *Gian-Luca Lardi*, il Grischun ch'è president dals impressaris da

construcziun svizzers. El ha ditg als impressaris grischuns da na mancar il svilup da la digitalisaziun. Ultra da quai ha el er cusseglià ils impressaris da cooperar pli savens. Anc na saja il contract da lavur general da la bransch da construcziun betg sut tetg. Las tractativas cun ils sindicats sajan stentusas, ha ditg Lardi. Per las firmas grischunas e cunzunt per las interpresas da construcziun che sajan dependentas da la lavur stagiunala saja indispensabel da pudair far diever dad uras da lavur flexiblas, ha punctuà il president dals impressaris da construcziun svizzers. A la fin dal 2018 duai il nov contract da lavur general esser sin maisa, ha ditg Lardi.

Reelecziun da l'entira direcziun

Markus Derungs, il president chantunal dals impressaris da construcziun, ha ditg a ses collegas da daventar pli activs sin il champ politic, cunzunt sin il champ chantunal cun sa metter a disposiziun per ina elecziun en il cussegl grond. La Societad grischuna dals impressaris da construcziun sustegna cun plaschair la candidatura dad *Andreas Felix*, il mainagestiu da la federaziun per la regenza grischuna. Cun applaus han ils preschents reelegi *Markus Derungs*, *Tavau*, sco president per ils proxims dus onns. Confermads en la direcziun da la societad èn vegnids: *Daniel Blumenthal*, *Vella*, *Martin Bordoli*, *Aschera*, *Martin Casutt*, *Falera*, *Roland Conrad*, *Zernez*, *Gian-Andrea Frehner*, *Domat*, *Oscar Gattoni*, *Soazza*, *Claudio Giovanoli*, *Tumegl*, *Diego Luzio*, *Savognin* e *Maurizio Pirola*, *San Murezzan*.



Da la partida a la radunanza generala èn er stads ils dus Sursilvans Martin Casutt (a san.) e Sigis Schmed.



L'impressari Luis Beer (a san.) cun cusseglier nazional Martin Candinas.



Gian Marco Hotz, Zuoz, è vegnì undrà per ses examen final da maister constructur federal.



L'antierius cusseglier nazional Duri Bezzola (a san.) cun l'impressari Roland Conrad.



L'impressari sursilvan Daniel Blumenthal (a san.) cun cusseglier guvernativ Mario Cavigelli.



Dus impressaris dal Grischun central: Hannes Parpan e Diego Luzio (da san.).